

Culastia Berther, Sedrun

8-3-94

Sche nus lessan resumar la veta dalla defuncta Culastia Berther savessen nus far quei culs paucs plaids: Ella ha sia veta surviu als auters. Damai che sia mumma, la Barla Tresa, ei morta gia 1924 – la Culastia haveva 17 onns – ha ei tuccau ad ella ed a sias soras gia baul da luvrar fetg e segidar en casa e sil funs.

En survetsch digl aug docter
Jeu selubeschel da citar quei ch'jeu ha-
vevel scret dalla Culastia a caschun da
ses 80 onns:

Ils megliers ed ils biars onns da sia veta ha la Culastia passentau sco survienta e casarina tier siu aug dr. Stiafen Berther, il mieri districtual a Mustér. A siu aug docter ha la Culastia fatg duront ca. 25 onns il percasa. Denton buca mo il percasa. Las biaras uras dil di era la Culastia cugl aug docter ella pratica ed assisteva il mieri tier la visitaziun dils malauns. Sche la Culastia haveva era buca fatg igl emprendissadi d'ina assistenta da mieri, sche era ella tras la pratica tier igl aug docter daventada ina assistenta indispensabla en la casa dil mieri a Mustér. E cu dr. Berther mava en las visch-nauncas dalla Cadi a dar la virola als af-fons, lu era il mieri accumpignaus dalla fideivla Culastia che capeva da trafficar cun ils utensils d'in mieri, ch'ins havess



pudiu crer ch'ella seigi sezza miedia stu-degiada. Sper la lavur d'ina assistenta restava ei aunc bia lavur da biro ch'igl aug docter saveva per buna part era sur-schar alla Culastia. En quella lavur da casarina ed assistenta dil mieri ha la Culastia anflau duront quels biars onns cumpleina cuntentientscha.

Dr. Berther ei morts 1950 e la Culastia ei lu vegnida a Camischolas e ha giu bien quitau da siu bab Gion Andriu tochen la mort da quel 1953.

Casarina en casa pervenda

Buca che la Culastia havess stuiu saver bien grau da survegnir ina piazza, per ella, enconuschenta sco femma da buna e cunscienziusa lavur, havess ei dau plazzas avunda. La buna Culastia ei stada promta da vegnir tier sur Tumaisch Berther sco casarina. Quitor-disch onns ha ella surviu en casa pervenda, 7 onns a Sur en Surses e 7 onns a Falera. En ina casa pervenda eis ei empau pli ruasseivel che en ina pratica d'in mieri, mo la Culastia haveva mai liunguria. Havend cumpleniu ils 60 onns ei la Culastia ida a casa a Camischolas. Cheu en sia casa paterna ha ella passen-tau ina biala sera dalla veta.

La Culastia haveva in dun tut special da surcuser bialas caussas e perquei ch'ella haveva ina buna vesida ha ella saviu far quei tochen en ses vegls dis. Era leger in bi cudisch, tedlar radio ni dar trocas en buna cumpignia fuvan per ella emperneivels passatemp. Ils davos onns ha la Culastia passentau en casa s. Vigeli a Sedrun. Cheu eis ella segidada cun la glieud veglia ed ha fatg bia buns survetschs als auters. Sco detg, la veta dalla Culastia ei stada in surviv al concarstgaun. Ina buna survienta eis ella stada. Ussa ha ella astgau udire ils plaids dil Segner: «Ti buna e fideivla survienta, entra en la legria da tiu Signur.»

Sur Tumaisch Berther